



Selasa, 01 November 2022
Ogen: Daniel 4:34-37



"Jore Ukurku"



Raja Nebukadneser e me raja Babilon si make kuasa i bas mimpin rakyatna. Kerina rakyat ras pengikutna patuh nandangi peraturen-peraturen si ipedarat raja. Tahun peduaken kenca Nebukadneser jadi raja, ernipi ia. Turah aru atena erkiteken nipina e. Ipepulungna kerina guru-guru si beluh ngoge nasib, guru pertendung bage pe guru si baso, tapi sada pe la ia ngasup lako ngantusi nipi raja. Dibata make Daniel lako banci mpetangkas nipi raja. Kejadin e erbahansa Daniel radu ras teman-temanna ndatken kesempatan guna banci tading i istana, dengen teman-teman Daniel mimpin propinsi si lit i Babilon. Nipi raja si peduaken pe, alu kuasa Dibata, Daniel ipengasupNa lako nuriken antusen nipi raja e. Antusen nipi raja sipeduaken mpeturah ukur si jore man raja. *"kenca lepas si pitu tahun ndai, kutare ku langit e maka enggo jore ukurku mulihi."* Kupuji Dibata si Meganjangna, *janah kupehaga dengen kupermuliaken Ia singgeluh rasa lalap."* Dibata nalihken ukur gulut raja Nebukadnezer jadi ukur si jore.

Bas perdalanan kegeluhen, megati lit si erbahan ukur gulut dengen ukur jore; umpamana: sinuan-sinuan la kena erga turah ukur gulut, anak-anak la megiken kata e pe banci erbahan ukur gulut, pandemi si lenga erkedungen pe erbahanca ukur gulut; kurang kita i pujiken gulut ukur entah pe ndele ateta; tapi dikune seh bagi sura-sura e erbahansa ukur jore. Raja Nebukadnezer pe ope denga ituriken Daniel kerna antusen nipina seh kel akapna gulutna; tapi kenca nggo ituriken Daniel kerna antusen nipi e, jore kel ukurna.

Arah renungen paksa tenengta wari enda, i babai kita kerina moria GBKP lako nggejapken maka adi ukur gulut, ayo serbut turah me pinakit tapi adi ukur jore, ayo mejile turah ate malem. Emaka amin uga gia sekali man alanken bas perdalanan geluhta tetaplah kita erkiniteken man Tuhan, gelah tetap jore ukurta.